

四庫全書

集部

欽定四庫全書

陸士龍集卷四

晉 陸雲 撰

詩

答兄平原

悠遠塗可極別促怨會長  
銜恩戀行邁興言在臨觴  
南津有絕濟北渚無河梁  
神往同逝感形留悲參商  
衡軌若殊迹牽牛非服箱

兄贈

行矣怨路長，怒焉傷別促。  
指途悲有餘，臨觴歡不足。  
我若西流水，子如東峙嶽。  
慷慨逝言感，徘徊居情育。  
安得攜手俱，契濶成駢服。

為顧彥先贈婦四首

我在三川陽，子居五湖陰。  
山海一何曠，譬彼飛與沈。  
目想清慧姿，耳存淑媚音。  
獨寐多遠念，寤言撫空襟。  
彼美同懷子，非爾誰為心。

悠悠君行邁，  
梵梵妾獨止。  
山河安可踰，  
永路隔萬里。  
京室多妖冶，  
冶粲粲都人子。  
稚步擢纖腰，  
巧笑發皓齒。  
佳麗良可美，  
衰賤焉足紀。  
遠蒙春顧言，  
銜恩非望始。

翩翩飛蓬征，  
郁郁寒水紫。  
遊止固殊性，  
浮沈豈一情。  
隆愛結在昔，  
信誓貫三靈。  
秉心金石固，  
豈從時俗傾。  
美目逝不顧，  
纖腰徒盈盈。  
何用結中欸，  
仰指北辰星。

浮海難為水，  
游林難為觀。  
容色貴及時，  
朝華忌日晏。  
皎皎彼姝子，  
灼灼懷春粲。  
西城善稚舞，  
總章饒清彈。  
鳴簧

發丹唇朱絃繞素腕輕裾猶電揮雙袂如霧散華容溢  
藻幄哀響入雲漢知音世所希非君誰能讚棄置北辰  
星問此玄龍煥時暮復何言華落理必賤

答張士然一首

行邁越長川飄飄冒風塵通波激枉渚悲風薄丘榛脩  
路無窮迹井邑自相循百城各異俗千室非良隣歡舊  
難假合風土豈虛親感念桑梓域鬢眼中人靡靡日  
夜遠眷春懷苦辛

芙蕖

綠房含青實金條懸白瑯俯仰隨風傾煒燁照清流

嘯

逍遙近南畔長嘯作悲歎



陸士龍集卷四

欽定四庫全書

集部

陸士龍集卷五至七

詳校官監察御史

臣曹錫寶

檢討臣何思鈞覆勘

覆校官編修

臣莊通敏

校對官中書

臣李荃

謄錄監生

臣王焜



欽定四庫全書

陸士龍集卷五

晉 陸雲 撰

誄

吳故丞相陸公誄

惟赤烏八年二月甲乙卯吳故使持節郢州牧左都護  
丞相江陵郡侯陸公薨嗚呼哀哉皇朝迭紹成命昊天  
聖王作矣世有哲臣觀監在吳乃降斯神思皇我后應

運對揚穎秀若華景逸扶桑龍輝紫極鳳鳴玉堂舉旗  
清阻奮鉞夷荒悠結沈維峻極公綱將撫遠績括地九  
圍皇淳爽泰昊旻疾威生民如何哲人其頽登靈在天  
遺音播徽敢揚元勲表之素旂乃作誄曰

濟哲我祖時文峻德玄粹納真清休載式本承慶輝駿  
惠罔極申錫多祜本支千億芳條達蔭靈根茂植根條  
伊何苗黃裔舜長發有祥貽我祚晉神明之緒實蕃瓊  
雋和音嗣世不替碩彥明鑒在下降命上玄我公初載

天嘏之純重光納照璇璣授銓仰儀喬嶽俯濯洪川清  
輝秀穎雲翹映晨肇彼歧嶷允迪天真先心則智率意  
斯仁秉彝清昧體靈協神神休載鑠九德無和挹揮茂  
朴豐淳鎮華景峻凌高玄源踴波造辰竦隆彌海廓遐  
光備既淳逸軌爰超閎網苞荒景靈渥耀山林嶽秀天  
光乃照窮化機神探賾衆妙駭塵氛埃澄響清肖恢淵  
博量驕嶮峻邵振綱宇表登軌絕蹈厥初藏器栖蟠海  
嶽披藻崑崙濯秀腸谷沈輝熙茂清塵熠鑠含章在淵

發輝龍躍時伏陽九承乾之衰有皇于井玉軒徘徊爰  
茲赫奕需期雲飛天步皇輿載見太微華堂誕基委蛇  
自階鼎輝既濟嘉命乃集和羹未飪宰物下邑康年屢  
登惠風時協在斷無頗于教斯輯金虎覲精戎車孔肆  
神器播越天人釋位有命在茲帝思元帥委弁總干振  
翼虎噬威靈既授六軍有序乃誓我衆乃整我旅神干  
山立雄旗電舉懸旌汜陽即戎江許我后日敬上帝臨  
予靖端夙夜匪寧匪處經始綿綿滂沱惟海乃幹中軍

入作內輔公侯陟降在帝左右關羽滔天作靈西土帝  
曰將軍整爾熊虎赫赫明明皇輿出祖龍舟照淵旛旄  
映野鋪敦江漬仍執醜虜荆南既集方嶮未夷天子命  
我撫之西垂公侯戾止威神緝熙虔劉作虐思輯子來  
妖於北靡塞爾雄旗獷彼群蠻祁祁遺黎柔遠能和薄  
言綏之方隅肅清烈文雋武舍爵明堂冊勲天府天子  
曰咨我圖乃功錫爾青土建侯于東開國名墟光宅海  
邦分圭作寶軒輅以庸既受帝祐公用加大駟鐵孔阜

元戎杳藹淑旂飛藻綏章承蓋振我輝靈四方于邁劉  
王負嶮寇我西隣公侯赫怒干戈啓陳金鉞鏡日雲旗  
絳天凌岡襄嶽沈維括淵元王隕難鯨鯢墜鱗戎漢時  
殪方域清塵曹休東踰我疆斯越帝簡厥佐將命其傑  
乃俾我公啓行警伐江漢之許天子授鉞揖帝整旅隱  
爾霆發桓桓神誅震驚魏方我公矯矯虎視元戎截彼  
醜旅效此武功武功既彰天威薄曜靈武震華邊垂清  
暴振旅凱入王假有廟假廟伊何本膺寵祚土田陪敦

四牡載路出餞于郊此惟予顧禮嘉嵩高樂和湛露改  
容肅至傾蓋罷步輦帶翩紛珍裘阿那區宇惟寧繁遏  
帝祉於穆疇咨敷奏多士將庸元輔相維天子僉曰公  
侯宜有爰止繡裳縟藻袞帶重縈遂虛上司命公登宰  
帝曰丞相朕嘉君德以茲軒冕往踐乃職宣爾叡心維  
黃協極邦國若否四方爾式公拜稽首欽翼明聖乃御  
機衡仰徽七政祗恪丕顯無易惟命巍巍天邑惟清四  
門公侯作弼煥炳星文重輝熾景協風烟煴百神秩祀

兆獻思淳克諧庶尹遂成帝勲時雍既濟王途克廣儀  
形我度軌物垂象後遐施歸崇蔭惠仰茂德栖音廣問  
沈響洪範遠迪玄猷洞深靈澤崇數天嶮垂陰翰飛樂  
嶮淵蟠泳沈澤豐泉丘潤博雲林遭世大過彛倫靡肅  
亶亶公侯思維雅俗發憤戎衣永言禮樂被分敦化荷  
戈思學體仁長物御禮熙國叡鑒擢微玄輝鏡璞戒危  
膏粱收俊白屋五品時訓民神攸鑠我有煥文如曜如  
辰何以崇之匪闡伊人我有烈武如震如霆何以將之



保大豐年思弘景業熙世登民克壯碩老秉鉞河津祉  
祚勿引早世幽神仰慕遺輝寤辟憂殷嗚呼哀哉永惟  
我公克明德心紛藹芳和被之惠林公侯沒矣孰嗣徽  
音名存體逝德懋形潛民之秉思好是謳吟嗚呼哀哉  
惟帝念功寵命光大考謚典謨崇榮協泰安宮載考我  
公于邁轡軒啓塗先驅警旆哀風結輿遺思馮蓋舍此  
休明即彼重藹攀慕靡及永戀光愛嗚呼哀哉

晉故散騎常侍陸府君誄

惟太康五年夏四月丙申晉故散騎常侍吳郡陸君卒  
嗚呼哀哉天降純嘏誕育俊乂才雄九奧德鍾三懿應  
運繼期顯微闡昧特恢大猷雍化熙世昊天不弔奄忽  
零墜嗚呼哀哉朝隕棠榦邦喪國輝帝欽遺烈士詠清  
機思經皇心痛浹民懷揮淚充邑惜慟盈畿敢述洪迹  
于茲素旂其辭曰

於穆皇源時惟誕弘權輿有媯爰帝暨王徽音接響不  
祚克昌乾鑒南眷誕降我祖顯考尚書納言帝宇正命

惟允銓衡攸序篤生常侍固天所隆祚以靈粹陶以惠  
風道協體稟德與性鍾叡心遠暢淵思遐通瞻言潛覽  
克哲克聰耽精遐興肆志篇章仰咨遺訓思齊曩蹤摛  
光啓晦微言是綱錯綜群藝精徹毫芒顯允閑姿既明  
且偉敦叙汜愛經德紀義契濶邦族是綜是緯博約以  
禮陳錫載施雍雍閨闈克諧由仁率禮崇化色養寧親  
九族和睦德被宗姻猗猗髦俊祁祁縉紳鑽仰明範挹  
道希塵愷悌弘裕惠化是振潛機密暢靡幽不甄濯以

清波權以明鈴旌善板築刊穢紫辰邦無媿幸靈不牟  
真沐浴玄源風移俗純儀德鄒甸比化泗濱耀畧切輝  
既升末融爰莅揚邑作尹名邦密邇帝畿大東小東宣  
敷五教敞化以崇徵無墜命興無廢功帝欽良政民懷  
穆風粵稽舊章率由典刑考績三載絀幽陟明超踐皇  
闈紆組垂纓奕世納言帝衡以平本崇曩烈堂構克榮  
征輦屢振干戈未戢乃秉雄戟徵戎東邑四牡徂征威  
德以立爰守會稽青紱既襲帝曰欽哉疇咨群后改授

顯服屯騎是撫雍容皇甸綜文經武時值大過士爽其  
德虔惟常侍高明柔直履氷察霜淪心遠測春存三季  
形志于色頻顙厄運載離咎慝靖享思順曹氏匪革投  
弁釋紱浩思東嶽遁世無悶清源是濯馥風彌馨明徽  
載鑠皇途既闢天罔誕張運在九五違嶮即康猗歟高  
懿避風遠臧帝降大命丘園是揚裸將天邑舒藻舊京  
僉曰休哉昭德塞違乃升常伯補闕拾遺振纓紫極攄  
光太微奕奕玄冕熠熠貂璫仰耀皇維俯映明堂輿振

鳴鸞體佩琮璜居德彌冲雖休匪康既跚君宿未時鼎  
辰將陟太階弘載育民皇靈靡顧大命奄臻厲凶彌留  
儵忽頽湮嗚呼哀哉黃河難澄梁木易荒聖賢絕景希  
世齊光豈曰徒生實維天綱於鑠常侍本德昭仁俯鏗  
瑤響仰綴玉振其在克壯自蹇乘屯鳳翳靈條龍竄祕  
泉收逋匿耀洪畧陶緼雖躡嘉運託景風雲瑰光既耀  
靈寶未闡弗慮皇圖銜恨徂遷嗚呼哀哉江河慕海丘  
陵樂山於惟君德齊聖廣淵群彥景附漸化濯真蓋以

崇嚴函以裕淵西徂華源負澤慕塵幽萌潛暢滯思賴  
振六言六行匪君不肅五有三無匪君不極衡準失平  
匪君不直方榮遐邇匪君不式君其永沒民其焉則結  
思遺愛惟哀允惻嗚呼哀哉仲尼喪魯孺慕失聲國僑  
殞鄭邦無竽笙實惟常侍徽懿克明恩懷士心信結民  
情聞者巷泣赴者風征八音輟響獻酢弗營羽檄翳川  
輕駕盈庭揮袂雲藹殞淚雨零嗚呼哀哉伊惟平生襲  
寵荷輝愷樂承明桑梓猶哀聿懷震丘言告言歸明德

遠燭慮凶以吉雖則榮泰存亡是卹爰築新邑經始匪  
日眷懷不虞寧櫬斯室王事靡盬皇畿是旋鳴和吉往  
曾未決辰震斫凶歸輝景長泯痛感皇祇哀普四民鳴  
呼哀哉穆穆天子昭明有融乃命王人禮憲是崇賜以  
歸賻榮以贈終冠蓋南徂映族輝邦日薄南陸辰次天  
漢龜筮協貞靈域載判明器既庇神道已羨縣象未登  
明星有爛軒車微動執紼同贊永棄高厦黃廬是館寧  
彼昏昧荒此輝粲幽房長鍵修夜靡旦翼翼輕蓋翩翩



丹旂龍章舒藻旗旒有輝轡輪轆結玄駟徘徊人誰弗  
思靡思匪哀援札心楚投翰餘悲嗚呼哀哉

晉故豫章內史夏府君誄

惟永寧元年五月二十五日晉故豫章內史夏府君卒  
嗚呼哀哉乾鑒育俊崇茲大猷景靈垂祐黃精協符濯  
蹤浩素闡志玄流熙光聖代邁勲九區哀彼造物殂命  
不均既褒斯美茲遐年祁祁搢紳泣涕流連故作斯  
誄著之不泯其辭曰

於穆府君遠祖彌光功濟黎獻澤洽八荒披圖承禪襲  
化軒唐洪風既振遐曜休煌越殷自周紹膺遺祉亮節  
三恪侯服千祀悠悠訖茲徽烈不已奕世本弘厥美是  
紀惟神隆慶篤生府君玄祐秀朗暉景烟煴誕載豐美  
俊穎夙繁性與體和孝友穆融虔茲君親姻族睦崇情  
廣褒誘品物虛躬安仁履素接舊以冲澄鑒博映哲思  
惟文淪心衆妙洞志靈源探幽判疑沈欲焱分甄滯群  
祕義猶一貫崇規邈世體道而盤膽言先機蔚藻騰翰

處約由厚交順于顏文武未墜君惟克修百行殊揆君  
望斯周栖義初九戢翼洪條瓊輝四灼景問綢繆在昔  
我國元首載哲假寐俟旦思庸俊逸旃檢高麾體亦秩  
秩儀刑柳惠庶績惟穆既穆其績英風彌邵天子有命  
曾是在朝頻繁帷幄祇承皇曜神以測幽明以遠照目  
難識夷觀嶮改蹈譬彼清鑒莫塵其操五紀迭御載隆  
載傾南嶽頽鎮蔭輝素靈瑾瑜遷寶投跡上京兆萌未  
緝皇聖攸嗟韋臨猗氏接被郇瑕道之以禮育之以和

齊俗拯弊民靡不嘉振我翰音洋鑠諸華明明皇儲叡  
哲時招奮厥河許矯足雲霄俄軒玄闕徽英揚颺光灼  
東朝髦士攸希媚茲一人亦既翰飛委蛇華閣陟降太  
微納言贊事淵裕徘徊習習和風惟穆惟宣亦曰武昌  
厥俗允新我后有命爰授俊臣君子云顧義在安親秉  
文共武言撫舊京仰肅慈顏俯熙典刑移彼滯汙泮宮  
時營衆否斯濟飛鶚革聲春翹晞景振鷺在庭高墉未  
奮遭茲閔凶頻頤泣血三載以終哀響未歇臺命朝隆

厥命伊何俾守南裔匪曰是屯託身虛桀巾車旣脂  
駕言將逝彛倫惟清路逼其序君之于遠乃恢斯緒思  
彼衆逸言尋厥楚暮瞻豐林晨看淵水濯竒以翹披途  
導軌彼湘之東地嶮俗危明德審罰替幽崇儀嚴不式  
刑仁扶物施威和咸振澤被遐畿皇道御世與民靡偏  
敷彼惠政濟此未均思一黔首濯漑義淵揖望皇命修  
翮徊翔循彼江濱乃眷豫章觀風樹政德音允張洪化  
既攄禮樂克昌閑非秋厲惠淑春陽廣命俊乂惟弓與

旃丘園靡滯鸞驥憑軒豈方伊類捉髮躬勤震我聲教  
邁嚮惟殷君化大揚自北而南君澤本沃河漢載咸慶  
輝雲蔭渥潤川漸將配皇宿登景具瞻昊天不弔乃降  
茲厲高祿未融凶焱中燧寢疾彌留大命隕墜邦家不  
紀沈哀結世嗚呼哀哉式玩遺美君實克明懷光暢幽  
晞髮結清體德秉真審行居貞屈曳蹈機與世靡矜天  
命隳謫唯仁則延任道委分亮曰斯然孰云府君不聞  
其言永懷載念憂心孔艱曰兄曰弟篤愛纏綿晞光繼

軌參融鴻振今君何之背世遐湮同生拊膺號哀瘁身  
眇眇孤微過庭曷遵天何忍斯于何之臻自君初邁既  
夷且榮今君反矣素旂垂銘雖光百辟託晷玄靈民慟  
于顯神旅于冥物從人感轅馬失征飄風悼響潛魚仰  
驚豐霄蹙陰衆羽徊鳴嗚呼哀哉瞻彼日月歲聿云夕  
寒暑窮化四辰交錯日考三從案轡長薄藹矣輻軒脫  
駕窻窻背榮孤世寧神大漠丘陵竦廕閑闔寒零寤標  
惟哀心摧涕散嗚呼哀哉咨予與君恩親之微蒙恤于

昔投纓瀾猗思周弱志永庇惠輝如何府君昭景長違  
願言永眷載傷載悲昔我經年逝彼川路進闕趨奔退  
違陵墓仰瞻靈丘俯增永慕惻剥肝懷哀其曷厝嗚呼  
哀哉

陸士龍集卷五



欽定四庫全書

陸士龍集卷六

晉 陸雲 撰

頌

登遐頌

夫死生存亡二理之已然者也而世有神仙登遐之言  
千歲不死之壽其詳固難得而精矣列仙之道作者既  
集而登遐未有焉莊周有言我試妄言之子試妄聽之

彼之有無蓋難以理求我之妄聽顧可以言寄之遂為  
頌云爾

郊間人

王子喬

玄洛

孔仲尼

九疑仙人

大勝山上女

李少君

梅福

張招

左元放

劉根

黃伯嚴

費長房

何女子

焦生

鮮卑務塵

韓衆

夷門子

林陽子

任作子

鬼谷子

淵哉郊間懷寶採新媚茲伯陽常道是黃俯翼遊周攜  
手入秦遺物執一妙世願神思我玄流浩若無津

王喬淵嘿遂志潛輝遺形靈嶽顧景亡歸變彼有傳與  
爾翻飛承雲儵忽飄飄紫微

玄洛妙識飢餌神頴在陰儵逝即陽無景逍遙北嶽凌  
霄引領揮霧昊天合神自靖

孔丘大聖配天弘道風扇玄流思探神寶明發懷周興  
言謨老靈魄有行言觀蒼昊清歌先試丹書有造

茫茫九疑登暉太素有漢登聞神具爾顧發彼靈丘聿  
來載步貽我則歌永揚遐祚

大勝之娥厥猶翼翼降宮有和納符帝側揮杖指辰絕  
音頽息茗茗玄右在彼峻極

少君善祠怡爾豐顏俯覲劉漢仰接姜桓式宴安期巨  
棗為餐神光攸往後來其嘆

在漢之衰頽火災精梅公指景有皇遺形逝彼文辭胥  
此洞庭神輝絕景豈外北冥

張招澄精妙思玄芒則是神物錯綜徽章乃幽乃顯若  
存若亡因形則變倏忽無方

生在清純放情玄昧在物淵沈沂虛攸遂清酒一壺百  
朋具醉有命集止乘龍來萃載見君子言觀其蔚

劉根登嵩遺世盤桓形委服容口厭瓊蘭挹彼呼翕為  
爾朝飡景絕巖穴光茂雲端

伯嚴志道翻飛自南北食中嶽練形嵩岑奔星凌顏朱  
光垂陰雲精九服握耀盈襟

長房有懷承師問道蒙險洪海晞心玄浩將登蓬萊祚  
爾難老嘉命既錫如何勿考

逝矣何女芳靈既彫安寢曾丘逝魂清霄喪魄載營大  
墓崇朝玉趾載步於焉逍遙

焦生卜居在河之東皓襟解帶嘉卉結容頤神太素淑  
思玄沖在彼黃堂明道固窮

北狄務塵在彼沙漠含神自頤靜居有恪自彼王庭聿  
來伊洛天子命之載見紫閣

衛矣終化靈毛揚葩慎爾貞心神祉來荷靡靡夷門體  
道含真飧茹靈卉凌雲願神

林陽餌車明視聰耳壯子既飧步晞千里任化凱入輕  
雲揮止移形善變載坐載起

悠悠鬼谷永言潛止要終有集資生無始綢繆方平在  
彼二子芬響蘭揮有來盈耳

盛德頌

余行經泗水高帝昔為亭長於此瞻望山川意有慨然

遂奏章以通情焉并為之頌云爾

晉太子舍人冀土臣雲稽首再拜上書皇帝陛下臣雲頓首死罪伏惟陛下紹軒轅之轍哲越三代之高蹤膺有聖之玄景蘊生民之上略秦政肆虐漸疊生民在昔上帝乃眷多方肅雍寶命鑒民顧天思文敷聖以宅神器六合炎駕八荒星錯企皇居於阿房倚逸鹿於九野謀猷回適天人匪祚乃蒲斯國授漢于西京是以先紹五緯章太素神母哀號底命丹野九垓闢授命之符鈞



天清建皇之鑒陛下螭蟠泗水龍躍下亭慶雲徘徊紫  
塵熠鑠皇威肇於斷蛇神武基於豐沛掩四維以蓋天  
廓玄謨以闢宇華宮山藏玉堂海紬雲蓋景陰金門林  
蔚拔足崇長揖之賓吐食納獻規之客玄猷上通德輝  
下濟仰翰雲禽俯躍魚魴是以四海之內莫不企景嶽  
以接羣望廣川而鱗集乘山涉水視險若夷奔波闕廷  
思効死節乃鳴鸞在衡奔驥服輅良平鳳栖信布虎據  
英雄凌暴於外奇謀補闕乎內威謀無陳智勇畢効乃

凌河海河海無梁乃仆高山嶽華不重三秦席卷項籍  
灰分逋虜霧散遺寇雲徹泛時雨以清天灑狂塵以肅  
地攬脩轡於丹輿竦峻蓋於蒼昊功濟宇宙德被羣生  
天人允嘉民神協愛厯數在身有命將集而陛下猶復允  
執高讓成功靡有普天歸德羣后固請然後謁天皇於圜  
丘巡萬乘於帝室率土離暴秦之亂臣妾蒙有道之惠  
戎羌蠻夷之墟雕趾肅慎之國莫非帝臣巍巍蕩蕩蓋  
天臨地自啓闢以來有皇之美未有若聖功之著盛者

也臣雲頓首頓首死罪死罪臣以鄙倍文武無施忝寵  
本朝承乏下位而臣邁愍自西徂東行邁攸止路經泗  
水伏見史臣班固撰錄聖功竊承陛下扶桑始照天暉  
未融之日嘗臨御此川於是即命舟人弭楫水泚瞻仰  
山川舊物不替永惟聖輝罔識所憑遠眺邇念感物興  
哀終懷靡及捫心遐慕臣命違千載之運身生四百之  
外恨不得役力聖明之鑒寓目風塵之會揮戈前隊待  
罪下軍抽鋒咸陽之關提鉞項籍之領痛心自悼不知

所裁行役之臣牽制朝憲雖懷彷徨王事靡盬將言  
邁實銜罔極臣聞遊魂變化神道無方雖聖靈登遐降  
陟在天連光五精流輝太一或冀神輿降觀薄狩五服  
時邁玉輅言巡茲邑是以下臣仰瞻紫宮俯要恍惚愚  
情振蕩靡審所如不勝延頸紫微結心閭闔之情謹住  
水濱拜章陳愚臣雲誠惶誠恐頓首頓首死罪死罪臣  
稽首以聞臣雲言臣聞歌詠所以宣成功之烈詩頌所  
以美盛德之容是以聞其聲則重華之道彌新存其操

則文王之容可覩永惟陛下聖德豐化比隆前代元勲  
茂功超蹤在昔故詩歌之所依詠金石之所揄揚者也  
臣謹上盛德頌一篇雖不足以仰度天高伏測地厚貴  
獻狂夫區區之情臣雲云晉太子舍人臣陸雲上

於皇漢祖纂胄有唐平章在昔文思百王丹輝栖列火精  
幽光爰茲聖緒顏維弛綱靈曜熠爍濟景扶桑則天未  
墜重規旻蒼其規伊何橫乾作峻厥德不回矩地能順  
憑河拓景襄岳殷韻龍章炯偉虎質碩變有秦不競罔

極黔首震驚予師思虔神主上帝曰咨天鑒有赫乃眷  
伊漢此惟予宅明明聖皇既受帝祉雲騰下邑風駭泗  
水仰鏡天文五緯同晷俯察雲符神母爰止思文聖王  
克廣克遐威凌羣桀德潤諸華爰祀天人天人攸嘉爰  
輯蒸徒蒸徒既和既和既順乃矢德音豐沛之旅其會  
如林朱旗虹超彤旆電尋推師蕭曹撫劒高吟元戎薄  
伐時罔不寵凌波川潰肆野陸沈咸陽克殄既係秦后  
戕戕阿房乃清帝宇穆穆聖皇天保攸定有頂畔換不

式王命王命旣愆黜我西土於鑠王師遵時匪怒爰赫乘  
豐席卷三夏嘽嘽戎軒矯矯乘馬變伐強楚至于垓下天  
誅薄曜暴籍授首區夏既混宇宙蒙又肅肅帝居巍巍  
神器有皇于登是臨天位繡文于裳組華于黻明明天  
子有穆其容至止鏘鏘相惟辟公宣聲路寢發號紫宮  
頌此愷悌以畜萬邦思樂皇慶協于時雍琴瑟在御大  
予舞功越裳委贄肅慎來王明明聖皇開國乘制分圭  
祚勞河山命誓禮律克彰典文垂藝有漢恢恢疏罔不

替聖功克明九方孔安良宰內幹武臣外閑漸澤冀域  
沾被戎蠻連光太素萬載不刊

祖考頌

雲之世族承黃虞之苗緒裔靈根之遺芳用能枝播千  
條穎振萬葉繁衍固於三代饗祀存乎百世豈非皇慶  
之積祐神明之殷祥者哉在周之衰有媯之後將育于  
姜而貞龜發鳴鳳之兆周史表觀國之繇故能光宇營  
丘奄有東海支庶蕃廡而胤祚昌大矣遭世多難子孫



蕩析逐于南土烈祖丞相邵侯顯考大司馬武侯明德  
叡哲沈雄特秀固上天所以繼跡前期惠成顧者也是  
以有吳雲興而邵侯龍見遂風騰海堦電斷荆楚運籌  
制勝底定經略文德光宣武功四克乃作台衡以御于  
王政天綱與先代比隆義問與前修接響固所謂汪洋  
浩浩不世出者哉武侯以光遠之度襲重規之範宣朗  
之明照曾暉之景故寅亮樞極則萬物淳曜緝熙有邦  
而宇內恪居及至中葉亂曰虎臣綏援既集而大難時

弭德濟封域之內威揚函夏之表遂仍世作宰焜耀祖  
業車實襲軌表不改帶元勲曷於光國洪烈著於隆家  
考德計功比之前代未有茂於此者也是以小子敢慕  
徽猷欽述芳烈雖不足以當朱弦之一唱發清廟之三  
歎蓋爾臣子之遺恩罔極之所處也乃作頌曰

悠悠聖緒上帝是臨世篤其猷于顯徽音神風往播福  
祿來尋靈根既茂萬葉垂林繁盛海堦穎寧漢陰既曰  
寧止芳祐允淑乃步斯淳降神有陸赫矣二公應期載

育明明邵侯允哲允謀叡心昭德淑問宣猷如日之升  
如川之至炎精既頽黃暉曷煥光宅海邦大造江漢王  
于出征二公斯難長驅致屈九有有判咸黜凶醜區域  
寧晏天祿未終大命有集卜食東夏元龜既襲聿來故  
宮作蕃舊邑公徒斯振帝旅凱入於變時雍神道經始  
肅肅九命永言徽止公拜稽首對敷天子猗歟盛歟邵  
侯有作我考纂戎爰究爰度遠除尋軌崇基式廓昭明  
有家祖廟奕奕中葉虎臣稱亂西秦靈旆電揮伐鼓霆

震會朝哀舉征不浹辰遐風遠掃萬里無塵有族斯祐  
念功在茲袞衣之宜遂作上司台光增朗方險載夷穆  
矣暉章有吳之旗我祖我考受言藏之嗟嗟藻裳再命  
同服駢駢四牡二世方轂分珪比瑞天秩底祿公堂峻  
趾華構重屋昔在二伊于殷有聲在漢之興亦曰韋平  
惟祖惟考履貞大亨邈彼披陽追蹤阿衡駿惠雨施景  
潤雲行洋洋玄化功濟其民風馳海表光被嶽瀕二后  
重規世有哲人肅雍碩響萬載是振

張二侯頌

有序

張氏之先蓋少昊氏之苗裔也其在春秋晉德方休而  
張老延譽爰暨有漢文成佐命於初基司空揚聲於末葉  
流長祚遠世不乏侯輔吳將軍文侯遭季末雲擾遂避  
難于東有吳之興寔為謀主桓王即世援建太祖知命審  
於將萌先識鏡於未兆遂作上將輔成王業立朝無不  
易之方正色有犯顏之亮固所謂蹇蹇王臣古之遺直  
者也奮威將軍定侯明德光遠軌量弘濟文敏足以華

國威略足以振衆重規繼體而大業暉崇故休祚頻繁  
寵靈仍世天秩之體彌彰而毀盈之心茲沖用能保寵  
固世考終碩問蓋竹帛之所光宣詠歌之所揄揚也乃  
作頌曰

烈文遠祖肇自上皇金天淳曜遂濟窮桑真人有作飛  
龍在天留侯載見階雲自淵即謀神造啓運妙玄有漢  
再命度邑于東其中葉誕育司空邈矣唐陵有恭斯  
庸寧行盈止世篤天祿神之聽思俾我戢穀繁過芳祐

底之洪族洪族既昌再惠音徽於穆二侯仍世雙飛堂  
堂輔吳抑抑奮威如龍之躍如鳳之輝薄言戾止在彼  
紫微金卯紛若四海畔換文侯乃顧妙世達觀逝彼塗  
方度茲江漢鳴飛遵海聿來有亂遭家不造殲我明聖  
桓后肇揚侯承末命皇大烝哉天保未定匪侯卹度宗  
緒孰正帝整我旅外薄四荒命作惟師時維鷹揚遂登  
上將亮彼大皇底邑昨土命珪有璋蹇蹇我侯明發宿  
夜襲彼遺直興言有暮聿懷來忠王室之故猗歟定侯

祇服清曜奕奕瓊範玉潤淑貌淵睟往藏朗思來照曾  
是徽章再世被荷庸勲開國明道隆家必必其芬淑問  
揚和有蔚其文如林之華皇矣帝祚受言既崇女有行  
作合儲宮條延延紫極穎衍皇靈疊疊定侯在盈思沖  
祇寵戒溢永懷慎終重光並曜播我芳風

贊

榮啓期贊

榮啓期者周時人也值衰世之季末當王道頽凌遂隱居



窮處遺物求己汴懷玄妙之門求意希微之域天子不得而臣諸侯不得而友行年九十被裘鼓琴而歌孔子過之問曰先生何樂答曰吾樂甚多天生萬物惟人為貴吾得為人矣是一樂也以男為貴吾又得為男是二樂也或皆不免於襁褓而吾行年九十是三樂也夫貧者士之常也死固命之終也居常待終當何憂乎孔子聽其音為之三曰悲常被裘帶索行吟於路曰吾著裘者何求帶索者何索遂放志一丘滅景榛數居真思樂之林利涉忘憂之沼

以卒其天年榮華溢世不足以盈其心萬物兼陳不足以易其樂絕景雲霄之表濯志北溟之津豈非天真至素體正含和者哉友人有圖其象者命為之贊其辭曰  
芒芒至道天啓德心自昔逸民遁志山林邈矣先生如龍之潛夷明收察滅跡在陰傲世求己遺物自欽景遜瓊輝響和絕音戀彼丘園研道之微思樂寒泉薄採春蕤鳴絃清泛撫節高徽有聖戾止永言傷悲天造草昧負道實嘉於鑠先生既體斯和熊羆作祥黃髮皤皤耽

此三樂遺彼世華翼翼彼路行吟以遊的的散冕陋我  
輕裘永脫亂世受言一丘媚茲常道聊以忘憂

文

嘲褚常侍文

六年正月以臨川府丞褚為常侍君子謂吳於是乎能  
官人官人國之所廢興也古之興王惟賢是與呂望漁  
釣而周王枉駕寧戚叩角而齊王忘寐委斯徒而縻好  
爵釋短褐而服龍章姬姜之族非無人也親昵之愛非

無懷也取彼庸賤之徒登之佐臣之列故九賢翼世而有命既集五子佐時匡霸以濟夫唯能官人之所由也褚氏大夫之常佐遠邦之賤司才則邵矣官實陋矣而拔出羣萃超昇階闥雖文王登師桓公取佐亦何以加之詩曰濟濟多士文王以寧言官人得才也褚常侍聞之喜曰君子之言豈虛也哉吾得此足矣君子謂褚常侍於是乎不謙謙也者致敬以存其位者也謙之不存德無柄矣世之治也君子自以為不足故撙節以求役

于禮敬讓以求安於仁世之亂也在位者自以為有餘  
故爵豐而求更厚位隆而欲復廣世之治亂恒由此作  
今褚侯蟬蛻槁木鵠鳴玉堂不庶幾夙夜允集衆譽  
而意充於一善心盈於自足足則無求盈則無戒不求  
則善遠之無戒則惡來之亦何以為君子哉詩云戰戰  
兢兢如臨深淵慎之至也褚常侍聞是言也懼謂之昌  
言也而拜之君子曰褚侯其幾矣聞善而喜過又應之  
懼嘉服義之賢而拜謹言之辱規同禹迹義均罪己君

子哉吳無君子斯焉取斯

牛責季友文

天造草昧萬物化淳類族殊品莫同乎人令子履方象  
以矩地戴圓規以儀天該芳靈之歎素挺協氣於皓玄  
故神窮來哲思洞無間踊翰則憤凌洪波吐辭則辯解  
連環子何不絕淵而躍照日之光使穎秀暘谷景溢扶  
桑俯經見龍之輝仰集天人之堂惟子之服既玄而素  
今子之滯年時云暮而冕不易物車不改度子何不使

玄貂左珥華蟬右顧令牛朝服青軒夕駕輶輅望紫微  
而風行踐蘭塗而安步而崎嶇隴坂息駕郊牧玉容含  
楚孤牛在疾何子崇道與德而遺貴與富之甚哉日月  
逝矣歲聿其暮嗟乎季友盛時可惜迨良期於風柔競  
悲飈於葉落陳讜言於洪範圖遺形於霄閣使景絕而  
音流芬身薦而榮赫奕子如不能建功以及時予請迹  
於桃林之薄

陸士龍集卷六



欽定四庫全書

陸士龍集卷七

晉 陸雲 撰

騷

九愬

昔屈原放逐而離騷之辭興自今及古文雅之士莫不以其情而玩其辭而表意焉遂厠作者之末而述九愬  
商皇聖之豐祐膺萬乘之多福真龍暉以底載啟元辰

而誕育考度中以錫命端嘉令而自肅蘭情馥以芬香  
瓊懷皎其如玉希千載以遙想昶遠思而自怡範方地  
而式矩儀穹天而承規結丹欵於璇璣協朱誠於四時  
咨中心之信修佩日月以為旗悲年歲之晚暮殉脩名  
而競心仰勲華之耿暉詠三辟之遐音握遺芳而自玩  
挹浩露於蘭林陰雲紛以興靄颼風起而回波黨朋淫  
以惡美疾傾宮之揚娥樹椒蘭於瑤圃掩夜光於瓊華  
邁貞心以誰忒毀玉質而蒙瑕甘芳言而棄予忽遐放

其若遺瞻前軌而我先顧後來而駕遲遲荒塗而伏軾  
撫鳴鸞而稱悲感瞻鳥之有集嗟離雁之焉歸靜沉思  
以自瘁願凌雲而高飛

修身

逢天怒而離紛遘時咎於惟塵端周誠以恪居祗後命  
而自寅悲讒口之罔極隔離情於參辰豈三錫之又晞  
乃裔予於遐賓運羽權以涉江浮鄂渚而駕言背夏首  
以窘逝兮沂行川而永歎結風回而薄水兮源波榮而

重瀾情懷眷以疊結舟淹流而中盤昶愁心以自邁肅  
榜人而曾謳詔河馮以清川命湘娥而安流濟南詔以  
佇望野蕭條而振疇獸悲號以命侶鳥狂顧而鳴仇悲  
我行之悠悠怨同懷之莫求發辰陽而往彼緣湘沅而  
來假亦芳樹於縣車秣梁苗於樊馬山嵩高以藏景雲  
掩靄而荒野鳥拊翼於覺巔水回波於宇下指明星以  
脉路景即陰而無旅隨長川以問津響修聲而和予聽  
歸音以自聞踐無迹以窮處雖遘愆之既多亦顛沛其

何侮仰衆芳之遺情希絕風之延佇亂曰有鳥翻飛集江湖  
兮彼美一人莫予將兮念茲涉江懷故鄉兮生日何短感  
日長兮顧我愁景惟永傷兮

涉江

厲操修於夙志積沉毒於苦心魂憑虛以飄蕩形息景於  
重陰虎鳴颺以拂谷螭回雲而結林操土音以懷郢涕頻  
代而盈襟辭終古之舊墟託茲邦而遥集望龍門而屢顧  
攀惟桑而抵泣悲愁心之難狀振枯形而獨立撫彫容之

日頽怊惘思而弗及聞先黎之達教固積善於遺慶晞明  
休而受言想介福之保定靡心貞以祇服汴大順而委命  
君在初之嘉惠每成言而永日怨谷風之攸歎彌九齡而  
未徹願自獻於承間悲黨人之造膝舒幽情其曷訴卷永  
懷而淹恤嗟哲士之足歎傷邦家之殄瘁痛靈修之匪懷  
頽九成於一簣忘大寶之勿假輕挈瓶之守器仰剪翮於  
凌霄俯歸飛於矰罟毀方城於秦川投江漢於泥渭悲彼  
黍之在郢悼宗楚之莫餽撫傷心以告哀將斯情之孰慰

悲郢

登高山以遐望念悠處之淹流豈大川之難濟悲利涉  
之莫由申修誠以砥節反內鑒而自求考余心其焉可  
往稽度於神謀訪斯言以卜居想貞龜以告猷將矯翼  
而塗險思振清而世濁菟釋筴而評子諒不疑其何卜  
朝彈冠以晞髮夕振裳而濯足有懷沙以赴淵無抱素  
而蒙辱愁纏綿以宅心長歎息而飲淚步江潭以彷徨頻  
行吟而含瘁遇漁父之戾止興讜言而來趙雖懷芳而握

瑜懼輕塵之我穢顧虛景而端形矧同波於俱醉迨伊  
人之逍遙聊仰葉於林側懷達心以遠寤怡哀顏而表  
色仰班荆之遺情想嘉訊而良食若有言而未吐忽棄  
予而凌波揮龍榜以鼓汰遺芬響而清歌俟滄浪之濯  
纓悲余壽之幾何愧褊心之歎渝恨爾謁之莫和捐江  
魚之言志營玄寢於汨羅苟懷忠而死節豈有生之足  
嘉

行吟



悲怨思之多感情惆悵而遠慕世玄黃而既渝心居貞  
而抱素冀斯氣之一清要佳人於天路考年載以遲之  
悲歲律之已暮攬豐草於朝日思先晞於湛露規法圓  
而天象矩則方於地形祇信順以自範邀式穀於神聰  
悲登魂之無抗訊貞夢而通靈悔抱道而懷顧悲實蕃  
之已盈頓椒丘而息駕振初服而翱翔結瓊蕤之芳襟  
襲凌華之藻裳懷瑤林之珍秀握蘭野之芳香命巫咸  
以啓期訪百神而考祥靖永言以聽命欽靈譔而肅邁

振華冕之玉藻樹象軒之高蓋鸞假翼以鳴和霓揮景  
而縈旒芳塵穆以烟煴彤雲起而深藹遊八極以大觀  
解飛轡以長想將結軌而世狹願援楫而川廣雖我服  
之方壯思振策其安往舒遠懷以弭節塞世羅於天網  
亂曰猗猗芳草殖山阿兮朝日來照發豐華兮秋風蕭  
瑟凝霜加兮傾葉懷春猶俟河兮

紆思

徧周流而無過悲窮思之永久聽幽荒而罔詔眷寥廓

而無友沉流液於繩樞逝回颺於甕牖呼寂寞而靡應  
攬虛無其何有神悠悠而永念憂綢繆而盈室哀惻心  
而響起時棄予而景逸招逝運其難徵儀遺範而無律  
雖芳林之將焚豈蘭響之可謐晞馥風於曠野思同芬  
而靡質命險太其靡常道離隆而匪易紆幽情而思古  
援在昔而立辟俟重華以同遊悲瑤圃之難適舟登陸  
其焉濟輪涉淵而無迹悲荒塗之既舛臨遵渚而投策  
欲隨波以周流恨匪石之難顏將從風而卷舒悲直矢

之辭懷貞朗志而玉折厲勁心而蘭摧喟我懷以寤歎  
闡前鑒而自融忠與邪其莫可豈余命之所窮俯投迹  
而世溘仰晞志而道隆耻蒙垢於同塵思振袂於別風  
明爽心以畢志考吾道以自終

考志

天機偏其挺蓋玉衡運而回襄景彌脩而日短時愈促  
而夜長和音變而改律乘風草而為商感秋林之夙暮  
悲芳草之中霜存條忽而風邁逝揮霍而雲散方輕焱

而炯遲比收電而景宴將愉樂以夙興迨良日於昧  
且痛予生之不辰逢此世之多難將藹藹而未颺世  
渾渾其難澄風頽山以離谷波平淵而為陵道曠世  
而朴散化固滯而物凝恨輶德以莫舉悲民鮮之孰  
勝景照明以妙見音振響而攄聞金淬堅以示斷芭  
靡質而效芬罄貞規以殉節反蒙謫於朋羣咨小心  
以惴惴悲江草之芸芸亂曰浮雲晦藹天明息兮矰  
羅重設鳳矯翼兮梧相逝矣樹榛棘兮思我芳林喟

歎息兮

感逝

哀時命之險薄懷斯類以結憂手拊膺而永嘆形顧景而長  
愁生遺年而有盡居靜言其何須將輕舉以遠覽眇天路而  
高遊結垂雲之翠虬駕琬琰之玉輿揮采旄以煙指靡華  
旌而電舒命日月以清天吾將遊乎九閭命屏翳以夕降  
式飛廉以朝興塗蒙雨而後清景貞暉而先登陪湘妃於  
彫輅列漢女以後乘瓊娥起而清嘯神風穆其來應騑憑


雲而響駭駭噓天而景凌望紫微以振策躡太階而遂  
升飛芝蓋之翼翼回雲車之嶙嶙朝總轡於扶桑夕飲  
馬於天津伐河鼓以解徵迄昆崙而凱振軌凌虛而遺  
迹塵蒙颺而絕輪豈遠遊之無樂懷故都而傷情靡龍  
首以還顧轉瑤衡而回紫沔凱風以流盼悲舊邦之穢  
傾眷南雲以興悲蒙東雨而涕零凌百川而絕蹈仰濯  
髮於崢嶸豈沉瘁之足弭將蟬蛻於長生

征

痛世路之隘狹詠遂古而長悲鏡端形於三接照直影  
於太微祇中懷以眷慕豈鑒寐而忘歸悼天朝之遂晦  
構貝錦於繁文侈南箕以鼓物藹青陽而播芬迹同塵  
而壤絕景和光而天分俯隕息於縈波仰頽歎而崩雲  
折若華以翳日時靡靡而難停殄秋菊以却老年冉冉  
其旣盈欲假翼以天飛怨曾飈之我經思戢鱗以遁沼  
悲沉網之在淵有河清而志得挫千載之長年擠哀響  
於頽風寓悲音於絕絃嗟有生之必死固逸我以自休



彼達人之遺物甘褰裳而赴流矧余情之沉毒資有生  
以速憂悼居世其何感固形存其為尤想百年之促期  
悲樂少而難多修與短其足老曷久沉於汨羅投瀾漪  
而負石涉清湘以懷沙臨恒流而自墜蒙濬壑之隆波  
接申胥於南江侶彭咸於水沱鼓層雲以攜手仰接景  
而登遐



陸士龍集卷七

欽定四庫全書

集部

陸士龍集卷八至十

詳校官監察御史臣曹錫寶

檢討臣何思鈞覆勘

覆校官編修臣莊通敏

校對官中書臣李荃

謄錄監生臣王焜

欽定四庫全書

陸士龍集卷八

晉 陸雲 撰

書

與兄平原書

一日案行并視曹公器物牀薦席具寒夏被七枚介幘如吳情平矢冠遠遊冠具在嚴器方七八寸高四寸餘中無鬲如吳小人嚴具牀刷膩處尚可識䟽杙剔齒纖

絰皆在拭目黃絮二在垢垢黑目淚所沾滂手衣卧籠  
挽蒲棋局書箱亦在奏案大小五枚書車又作岐案以  
卧視書扇如吳扇要扇亦在書箱想兄識彥高書箱甚  
似之筆亦如吳筆硯亦涵書刀五枚琉璃筆一枚所希  
聞景初三年七月劉婕妤折之見此期復使人悵然有  
感處器物皆素令送鄴宮大尺間數前已白其總帳及  
望墓田處是清河時臺上諸奇變無方常欲問曹公使  
賊得上臺而公但以變譖因旋避之若焚臺當云何此

公似亦不能止文昌殿北有閣道去殿文內中在東殿東便屬陳留王內不可得見也

一日上三臺曹公藏石墨數十萬片云燒此消復可用然煙中人不知兄頗見之不今送二螺

省曹公遺事天下多意長才乃當爾作弊屋向百年于今正平夷塘乃不可得壞便以斧斫之耳爾定以知吏稱其職民安其業也

雲再拜前省皇甫士安高士傳復作逸民賦今復送之

如欲報稱久不作文多不悅澤兄為小潤色之可成佳  
物願必留思四言五言非所長頗能作賦為欲作十篇  
許小者以為一分生於愁思遂復文誨欲得雲論間在  
郡紛紛有所鈎定言語流行斷絕欲更定之而了不可  
以思慮今自好醜不可視想冬下體中佳能定之耳兄  
文章已自行天下多少無所在且用思困人亦不事復  
及以此自勞後間居恐復不能不願當自消息謹啓  
雲再拜祠堂頌已得省兄文不復稍論常佳然了不見

出語意謂非兄文之休者前後讀兄文一再過便上口  
語省此文雖未大精然了無所識然此文甚自難事同  
又相似益不古皆新綺用此已自為洋洋耳荅少明詩  
亦未為妙省之如不悲苦無惻然傷心言今重複精之  
一日見正叔與兄讀古五言詩此生歎息欲得之謹啓  
雲再拜二祖頌甚為高偉雲作雖時有一佳語見兄作  
又欲成貧儉家無緣當致兄此謙辭又雲亦復不以苟  
自退耳然意故復謂之微多民不輟歎一句謂可省武



烈未得有吳說桓王之事而云建其孤恐太祖不得為  
桓王之孫雲前作此頌及信以白兄作遊仙詩故自能  
劉氏頌極佳但無出言耳二頌不減復過所望如此已  
欲解此公之半歲暮賦甚欲成之而不可自用得此百  
數十字今送不知於諸賦者不罷少不想少佳成當送  
到洛陳琳大荒甚極自雲作必過之想終能自果耳謹  
啓

雲再拜兵真凶事生來初不見習頃觀之正自使人意

惡羊腸轉時極佳問人皆不解何以作此轉雖云欲相  
泄恐此正自取好耳說之不能工願兄試一說之張義  
元荅員淵之回流崑崙吐河不體正自似急水中山石  
間是人謂回轉者但言之辭不工耳不知此中語於諸  
賦中何如

頃日極匆匆病一十當出略過日在馬上此不可諧又  
恐信不及兄今以因休祖致又力作無錫書極無賴甚  
不備具如是更白問於中

雲再拜省諸賦皆有高言絕典不可復言頃有事復不大快凡得再三視耳其未精倉卒未能為之次第省述思賦深情至言實為清妙恐故復未得為兄賦之最兄文自為雄非累日精拔卒不可得言文賦甚有辭綺語頗多文適多體便欲不清不審兄呼爾不詠德頌甚復盡美省之惻然扇賦腹中愈首尾發頭一而不快言烏云龍見如有不體感逝賦愈前恐故當小不然一至不復減漏賦可謂清工兄頓作爾多文而新奇乃爾真令

人怖不當復道作文謹啓

雲再拜祠堂贊甚已盡美不與昔同既此不容多說又  
皆一事非兄亦不可得見弔少明殊復勝前弔蔡君清  
妙不可言漢功臣頌甚美恐弔蔡君故當為最使雲作  
文好惡為當又可成耳至於定兄文唯兄亦恕其無遺  
情而不自盡耳丞相贊云披結散紛辭中原不清利兄  
已自作銘此但頌實事耳亦謂可如兄意直說事而已  
右當復屬文於引便當書前銘耳謹啓

雲再拜誨欲定吳書雲昔嘗已商之兄此真不朽事恐不與十分好書同是出千載事兄作必自與昔人相去辯亡則已是過秦對事求當可得耳陳壽吳書有魏賜九錫文及分天下文吳書不載又有嚴陸諸君傳今當寫送兄體中佳者可並思諸應作傳及作引甚單常欲引之未得兄所作引甚好雲方欲更作引述思賦儻自竭厲然雲意皆已盡不知本復何言方當積思思有利鈍如兄所賦恐不可須願兄且以示伯聲兄弟

前日觀習先欲作講武賦因欲遠言大體欲獻之大將軍才不便作大文得少許家語不知此可出不故鈔以白兄若兄意謂此可成者欲試成之大文難作庶可以為關雎之見微謹啓

雲再拜往日論文先辭而後情尚潔而不取悅澤嘗憶兄道張公父子論文實欲自得今日便欲宗其言兄文章之高遠絕異不可復稱言然猶皆欲微多但清新相接不以此為病耳若復令小省恐其妙欲不見可復稱

極不審兄猶以為爾不茂曹碑皆自是蔡氏碑之上者  
比視蔡氏數十碑殊多不及言亦自清美愚以無疑不  
存三祖贊不可聞武帝贊如欲管管流澤有以常相稱  
美如不史願更視之小跛幾而悅奕為盡理雲今意視  
文乃好清省欲無以尚意之至此乃出自然張公在者  
必罷必復以此見調不知九慙不多不當小減九悲九  
愁連日鈔除所去甚多才本不精正自極此願兄小為  
之定一字兩字出之便欲得遲望不言謹啓

雲再拜仲宣文如兄言實得張公力如子桓書亦自不  
乃重之兄詩多勝其思親耳登樓賦無乃煩感丘其弔  
夷齊辭不為偉兄二弔自美之但其呵二子小工正當  
以此言為高文耳文中有於是爾乃於轉句誠佳然得  
不用之益快有故不如無又於文句中自可不用之便  
少亦常云四言轉句以四句為佳往曾以兄七美回煩  
手而沉哀結上兩句為孤今更視定自有不應用時期  
當爾復以為不快故前多有所去喜霽俯煩習均弔誠



重離此下重得如此語為佳思不得其韻願兄為益之  
謹啓

雲再拜嘗聞湯仲歎九歌昔讀楚辭意不大愛之頃日  
視之實自清絕滔滔故自是識者古今來為如此種文  
此為宗矣視九章時有善語大類是穢文不難舉意視  
九歌便自歸謝絕思兄常欲其作詩文獨未作此曹語  
若消息小佳願兄可試作之兄復不作者恐此文獨單  
行千載間嘗謂此曹語不好視九歌正自可歎息王褒

作九懷亦極佳恐猶自繼真玄盛稱九辯意甚不愛  
雲再拜頃得張公封禪事平平耳不及李氏其文無比  
恐非其所作欲見此公劉氏世頌有信願付雲頃又為  
輔吳奮威作頌欲愈前頌然意並不以快遣信當送九  
愍三賦脫然謂可舉意假彼頌便有怯處想無又問便  
可耳大類不便作四言五言謹啓

雲再拜誨二賦佳久不復作文又不復視文章都自無  
次第文章既自可美且解愁忘憂但作之不工煩勞而

棄力故久絕意耳在此悲思視書不能解前作二篇後  
為復欲有所作以慰小思慮便大頓極不知何以乃爾  
前登城門意有懷作登臺賦極未能成而崔君苗作之  
聊復成前意不能令佳而羸瘁累日猶云愈前二賦不  
審兄平之云何願小有損益一字兩字不敢望多音楚  
願兄便定之兄音與獻彥之屬皆願仲宣須賦獻與服  
繁張公語雲云兄文故自楚須作文為思昔所識文乃  
視兄作誄又令結使說音耳兄所撰願且可付之此有

書者更校善書送信還望之謹啓

雲再拜疏成高作未得去省登遐傳因作登遐頌須臾  
便成視之復謂可行今並送之尚未定刊及此信今更  
有何所損益後八人了無事合會之才得二篇耳索度  
是淫鬼無緣在此中故不可作頌愁邑忽欲復作文臨  
時輒自云佳小久報不能視為此故息意文欲定前於  
用功夫大小文隨了為以解愁作爾今視所作不謂乃  
極更不自信恐年時間復捐棄之徒自困苦爾兄小加

潤色便欲可出極不苦作文但無新奇而體力甚困  
耳謹索幼安在此令之草今住一弘不呼作工謹啟  
雲再拜誨頌兄乃以為佳甚以自慰文章當貴經緯如  
謂後頌語如漂漂故謂如小勝耳九慙如兄所誨亦殊  
過望雲意自謂當不如三賦情難非體中所長欲徧周  
流雲意亦謂為佳耳然不云其愈於與漁父吾今多少  
有所定及所欲去留欲爾今送本往不審能勝故不意  
亦殊未以為了南去轉遠洛中匆匆少暇願兄勅所遣

留為當爾可須來不佳思慮益處未能補所欲去徹與  
察皆不與日韻思惟不能得願賜此一字雲作文如兄  
所論已過所望況乃敢當今兄有張蔡之懷得此乃懷  
怖也謹啟

雲再拜誨歲暮如兄所誨雲意亦如前啓情言深至述  
思自難希每憶常侍自論文為當復自力耳雲意呼發  
頭但當小不如復耳兄乃不好者試當更思之所誨雲  
文所比愁霖喜霽之徒實有可爾者登樓名高恐未可

越爾楊四公黃胡頌恐此不得見比聞兄此誨若有喜  
懼交集祖德頌無大諫語耳然靡靡清工用辭緯澤亦  
未易恐兄未熟視之耳兄文方當日多但文實無貴於  
為多多而如兄文者人不厭其多也屢視諸故時文皆  
有恨文體成爾然新聲故自難復過九悲多好語可耽  
詠但小不韻耳皆已行天下天下人歸高如此亦可不  
復更耳兄作大賦必好意精時故願兄作數大文近日  
視子安賦亦對之歎息絕工矣兄誨又爾故自是高手

謹啟

雲再拜蔡氏所長唯銘頌耳銘之善者亦復數篇其餘  
平平耳兄詩賦自與絕域不當稍與比校張公昔亦云  
兄新聲多之不同也典當故為未及彥藏亦云爾又古  
今兄文所未得與校者亦惟兄所道數都賦耳其餘雖  
有小勝負大都自皆為雄耳張公父子亦語雲兄文過  
子安子安諸賦兄復不皆過其便可可不與供論雲謂  
兄作二京必傳無疑久勸兄為耳又思三都世人已作



是語觸類長之能事可見幽通賓戲之徒自難作賓戲  
客語可為耳荅之甚未易東方士所不得全其高名頗  
有荅極謹啓

雲再拜誨九愍如所勅此自未定然雲意自謂故當是  
近所作上近者意又謂其與漁父相見以下盡篇為佳  
謂兄必許此條而淵弦意呼作脫可行耳至兄唯以此  
為快不知雲論文何以當與兄意作如此異此是情文  
但本少情而頗能作記說耳又見作九者多不祖宗原

意而自作一家說唯兄說與漁父相見又不大委曲盡其意雲以原流放唯見此一人當為致其義深自謂佳願兄可試更視與漁父相見時語亦無他異附情而言恐此故勝淵弦兄意所謂不善願疏勅其處緒亦欲成之今出意莫更感如惡所在以兄文雲猶時有所能得言雲前後所作謹啟

雲再拜誨前二賦佳視之行已復不如初昔文自無可成藏之甚密而為復漏顯世欲為益者豈有謂之不善

而不為懷此不成意想兄已得懷之耳有作文唯尚多而家多猪羊之徒作蟬賦二千餘言隱士賦三千餘言既無藻偉體都自不似事文章實自不當多古今之能為新聲絕曲者無又過兄兄往日文雖多瑰鑠至於文體實不如今日間在洛有所視已當報而比更隆以今意觀文見此真更以為不盡善文羅云故日向人歎兄文人終來同殆以此為病張公文無他異正自清省無煩長作文正爾自復佳兄文章已顯一世亦不足復多

自困苦適欲白兄可因今清靜盡定昔日文但當鉤除  
差易為功力誨已定敬長誅意當闇與兄合雲久絕意  
於文章由前日見教之後而作文解愁聊復作數篇為  
復欲有所為以忘憂貧家佳物便欲盡但有錢穀復羞  
出之而體中殊不可以思慮腹立滿背便熱亦誠可悲  
間視大荒傳欲作大荒賦既自難工又是大賦恐交自  
困絕異往經比干墓悵然欲弔之無又即意又事業  
雲再拜張公箴謀自過五言詩耳但雲自不便五言詩

由已而言耳玄泰誅自不及士祚誅兄丞相箴小多不  
如女史清約耳恐兄無緣思於此意猶云何而兄乃有  
高論更復無意雲故日不作文而常少張公文今所作  
兄輒復云過之得作此公輩便可斐然有所謝故自為  
不及諸碑箴輩甚極不足與校歌亦平平彼見人讚叙  
者當與令伯論吳百官次第公卿名伯略盡識少交當  
具頃作頌及吳事有愴然且公傳未成諸人所作多不  
盡理兄作之公私並叙且又非常業從雲兄來作之今

略已成甚復可惜事少功夫亦易耳猶可得五十卷謹  
啟

義高家事正當付令文耳弟彥長昔作吳事云三十卷  
可令欽求謹啟

雲再拜吳書是大業既可垂不朽且非兄述此一國事  
遂亦失兄諸列人皆是名士不知姚公足為作傳不可  
著儒林中耳不大識唐子正事愚謂常侍便可連於尚  
書傳下書定自難雲少作書至今不能令成日見其不

易前數卷為時有佳語近來意亦殊已莫莫猶當一定之恐不全此七卷無意復望增欲作文章六七紙卷十分可令皆如今所作輩為復差徒爾文章誠不用多苟卷必佳便謂此為足今見已向四卷比五十可得成但恐胸中成癩爾恐兄胸疾必述作人故計兄凡著此之自損胸中無緣不病作書猶差易讚叙亦復無幾年歲限之猶當小復謹啓

雲再拜一日會公大欽欣命坐者皆賦諸詩了不作備

此日又病極得思惟立草復不為乃倉卒退還猶復多  
少有所定猶不副意與頌雖同體然佳不如頌不解此  
意可以不弘遠去當祖道似當復作詩構作此一篇至  
積思復欲不如前倉卒時不知為可存錄不諸詩未出  
別寫送弘遠詩極佳中靜作亦佳張魏郡作急就詩公  
甚笑燕王亦似不復祖道弘遠已作為存耳兄園葵詩  
清工然猶復非兄詩妙者雲詩亦唯為彼一語如佳先  
已先得便自委頓欲更作之昔如已身先此篇詩了不



復仞佛識有此語此語於常言為佳謹啓

雲再拜久不復作文了無復次第真玄昔屢聞周侯至  
論前比霖雨此下人亦作愁霖賦好醜見教又因人見  
督自愁慘又了無復意此家勤勤難違之亦復毒此雨  
憂邑聊作之因以言哀思又作喜霽今送雲作為易得  
耳窮不好故都絕意此間人呼作者皆休故不得有所  
送不審此何成已出之故為存不棄耳謹啓

雲再拜一日視伯喈祖德頌亦以述作宜褒揚祖考為

先聊復作此頌今送之願兄為損益之欲令省而正自  
輒多欲無可如省碑文通大悅愉有似賦愚謂小復質  
之為佳前作此頌書之行欲遣信以白兄昨聞有賊消  
息愁憤無賴既冀又然又已成書聊以付信耳尋得李  
寵勸封禪草信自有才頗多煩長耳令送間人又有張  
公所作已令寫別送臨紙罔罔不知所言謹啓

近得洛消息滕永適去二十日書彥先訪為驃騎司馬  
又云似未成已訪難解耳敬屬司馬參軍此間復失之

恨不得與周旋戴允治見訪大司馬謹啓

雲再拜君苗文天才中亦少爾然自復能作文雲唯見其登臺賦及詩頌作愁霖賦極佳頗倣雲雲所如多恐故當在二人後然未究見其文見兄文輒云欲燒筆硯以為此故不喜出之曹志苗之婦公其婦及兒皆能作文頃借其釋詢二十七卷當欲百餘紙寫之不知兄盡有不李氏云雪與列韻曹便復不用人亦復云曹不可用者音自難得正謹啓

近日復案行曹公器物取其剔齒穢一箇今以送兄  
兄于道有古方泉其銘如此不審兄頗曾見此書種稷  
不近因魯引以問秘書中謹啓

雲再拜令送君苗登臺賦為佳手筆云復更定復勝此  
不知能愈之不其人推能兄文不可言作文百餘卷不  
肯出之視仲宣賦集初述征登樓前耶甚佳其餘平平  
不得言情處此賢文正自欲不茂不審兄呼爾不真玄  
亦云兄文當作宣輩宣得此巍巍耳愁霖喜霽殊自委

頓恐此都自易勝謹啓

雲再拜誨頌兄意乃以為佳甚以自慰今易上韻不知  
差前不佳者願兄小為損益令定下云靈旆電揮因  
兄見許意遂不恪不知可作蔡氏祖德頌比不景猷有  
蔡氏文四十餘卷小者六七紙大者數十紙文章亦足  
為多然其可貴者故復是常所文耳雲頃不佳思慮胸  
腹如鼓夜不便眠了不可又以有意兄不佳文章已足  
垂不朽不足又多謹啓

雲再拜嵇紹周弼並處事不值免詔甚切甚念之悚息  
胡光祿亡宿士可痛含鄒還云滔中書散騎並缺是其  
才不知何以乃古之謹啓

雲再拜頃哀思更力成歲暮賦適且畢猶未大定自呼  
前後所未有是雲文之絕無又憶兄常云文後成者恒  
謂之佳貞小爾恐數自後轉不如今且欲寄之既未大  
定又恐此信至兄已發當因著洛謹啓

雲再拜兄前表甚有深情遠旨可耽味高文也兄文雖

復自相為作多少然無不為高體中不快不足復以自  
勞役耳前集兄文為二十卷適訖一十當黃之書不工  
紙又惡恨不精謹啓

陸士龍集卷八

欽定四庫全書

陸士龍集卷九

晉 陸雲 撰

書

與朱光祿書

少長之禮教化所崇中葉陵遲舊章廢替追惟前訓思  
遵在昔敢慕高義謹奏下敬

與張光祿書

三首



長幼之序人倫大司季世多難失敬在昔敢希令典求思自邁謹奏下敬以藉虔歎

顧今文彥先每宣隆眷彌恭之惠懷德惟慙守以反側既晞仁風委心自昵加與沛君分同骨肉憑藉之懷凝心如結

加蒙顧遇重以傾倒唯亮歸誠石行文敦素篤邃道實茂淑器敏既美思學又快南州良德今者東行望風自託其意繾綣願厚接納副其乃心

與嚴宛陵書

少長之序禮之大司晚節陵替舊章殘棄瞻言令典既  
慕欽承仰憑高風實副邦民謹奏下敬以藉虔歎思復  
未遠庶免悔吝

嚴宛陵答

奉詠美旨流風綽遠復禮興仁命世之作獲尚齒之  
况無尊賢之報抱此永懷愧歎何有君子弘道厚文  
無施是用釋筆歸于神要

與戴季甫書 七首

雲頓首頓首惟夏始暑願府館萬福疾病處遠人信希  
少情問闕替中間曠年瞻慕敬想興言反側隆敦比辱  
慰誨銜抱豐眷以增愚迹不勝勤企謹及君之書不以  
備

陸雲頓首頓首曠遠以來忽踰年載宗想輝蔭引領惟  
慕東歸之後疾患增瘳且道路悠遠不值信便久念自  
修而經年不果雖在伏枕至於結心注望實係光塵累

蒙誨命舊眷惟新執對之日如或面展長塗自替聽誨  
末由瞻企勤戀守以委重表不具今更繼情

季鸞公世相係徂落俊德茂業邦家之彥一朝並逝永  
爾淪沒哀痛切裂不能自勝奈何奈何江南初平人物  
失叙當賴俊彥彌縫其闕加在二賢楚國之良沉寶積  
實未重大朝重惟痛恨言增哀咽誠念仁風雋烈如在  
疇昔意愛所隆嗟悼之心誠不可言備蒙其分情兼切  
傷加承仁誨益以惻愴

武陵於荊州云多人士聞周孟子伍令明潘世長諸人並為美德心常依依今日遭遇良驥展才之秋也不審達者凡有幾人無因聽承誨語咨稟未聞每懷勤企表不盡言

長游前下停此十餘日想德欣喜無以為喻分別恨恨于今聽之當暑遠涉益追心懸清粹沈茂思敏通微居德履道秉心真實貴一時良彥君之別久見之懽察風姿美令心神烈暢已成美器欽愛之情款然至實近聞

若思未有通塗每用於邑

周安東昔奄薨徂追慕切剝不能自勝勲業弗究早爾  
背世遺惠鄱州民物同哀備記名義情兼切裂在此會  
同每言高重武陵至心歎列誠念篤終必垂悽愴王季  
楊孝友行素既簡清塵在此接近備其所顧居心秉尚  
用志不苟公私操實足為美器今為土斷品還此郡前  
羣小虛妄遂下其編牒為之憤歎人物遠士彞倫多失  
願垂末光益有以潤區區至心謹復言意戴彥遠永昌

猶為遠小想其必有惠政耳

郭敬言蒸陽良才遠負為之邑歎以其姿望足以致高  
想不久爾耳石行文在無錫大有清績一州之高功長  
吏此家行素道實州閭所稱疇昔接事既盡其才願重  
榮益以成其實凡在羽族思附鳳翼風塵所集無不拭目

與楊彥明書

七首

雲白欽明去書不悉彥先來得書以為慰時去再往歲

行復半悲此推移終然何及漸已欲熱想自如常悠悠  
守限良談未日眇然東望思以叙至及反憤固不多行  
矣愛德往來相聞

陸雲白省示累紙重存往會益以增歎年時可喜何速  
之甚昔年少時見五十公去此甚遠今日冉冉已近之  
已耳順之年行復為憂歎也柯生而多悅樂春未馱秋  
風行戒已悲落葉矣人道多故懽樂恒乏遨遊此世當  
復幾時各爾永禹良會每闌懷想親愛寤寐無忘書無



所悉

彥先來相欣喜便復分別恨恨不可言階塗尚否通路  
今塞令人惘然名論允進遠而有光者度此顯期不淹  
民望耳廟堂之士比迹山棲者悲歎豈惟一人少明湘  
公亦不成遷名公之舉且可以為資然今恨恨當行行  
復有宜耳

彥先相說疾患漸欲增廢深為怛然行向衰篤疾來應  
百年之望雖未必此為疑然親親所以相卹之一感耳

想懃服藥行復向佳耳吾既當羸間來體中亦恒少賴日  
爾匆匆則堪自力未速待罪會期難剋情之戀想何勞  
之多好自愛屢相聞

行言竟行令人恨之已當至未耶能少留不世明篤行  
至性如前後所論語其偶爾旋冀能悟耳而聞其遂遠  
邈真使愕然寧以所不可虧一國之清格乎輒便絕意  
彥先所一二

戴會稽如是便發分別恨然一時名士惟當有此君耳

失分重勞令人歎息善得日夕真家人若思望之清才  
俊類一時之彥善並得接九月中可得達東禮衡陽長  
沙甚快東人近未復有見叙者公進屈久恒為邑固黨  
方有清塗薄國讓在內中大有好稱此家一時美德也  
在事又佳甚快甚快

永耀已葬冥冥遠矣存想其人痛切肝懷奈何奈何聞  
伯華善佳深慰存亡人生有終誰得免此且使繼嗣克  
勝堂構有紹亦存亡之願也朋類喪索同好日盡如此

生輩那可復多耶臨書酸心

與陸典書

十首

雲再拜自曠但爾已復經時限制長路惟親未期嗟近  
晨風傾匡結言來誨綢繆篤眷彌隆誦玩千周以當侍  
會靜言莫瞻翹翹仰慕大人汜愛在我尤弘每銜思戀  
何時去心限此省省願言用替遙瞻靈丘感時情傷往  
來信理自更繼情如有信唯不玉音

雲再拜侍郎比侍數會同邪常憶戀此君不慙有殞此

卷九  
君公私並愴年長而志新齒邁而曾勤家宗美者也常  
感其篤分封之始年相見重達其至心

雲再拜日月運邁一何流連銜哀經變繫思愈深亡靈  
處彼黃塘幽曠在遠之憶心常愴裂含痛靡及悠悠奈  
何想時時復一省視思至心破無所屬情叔父一兄故  
尚未達想不久至耳深憂徙際公私哀罔曠離山墓永  
適異國四時靈寂桑梓靡循且念親各爾分析情感復  
結悲歎而已知大人每垂卹逮也臨表悲猥絕筆餘哀

不知所次雲再拜

每念彥先情兼剝裂年盛志美令姿可惜舉言及此不知心傷也

雲再拜國土之邦實鍾俊哲太伯清風遯世立德龍蛇東嶽三讓天下垂化邁迹百代所睇高蹤越於先民盛德稱乎在昔續及延陵繼響馳聲沉淪漂流優遊上國聆音察微智越衆俊通幽暢遐明同聖哲言偃昭烈於孔堂員武邁功於諸侯自秀偉相承明德繼踵亦為不

少吳國初祚雄俊尤盛今日雖衰未嘗下華夏也來誨  
所及遐邇同懷重及二聖下逮衆子或生羗狄或在邊  
域勲美之隆實如嘉誨愚以東國之士進無所立退無  
所守明裂眚苦皆未如意雲之鄙姿志歸丘壠華門閨  
窬之人敢睇天望之冀至於紹季札之遐蹤結禹肝於  
中夏光東州之幽昧流榮勲於朝野所謂闕管以瞻天  
緣木而求魚也重申不列雲再拜

雲再拜每惟大人挺自然之妙質稟淵姿之弘毅克壯

其烈兼詠之道希文尚武潛居以娛其志靜處以育其  
神遊步八素之林逍遙德化之圃豈如某者牽曳璚璫  
世道通明俊乂在官焉使希世之寶久隱岑峯之山逸  
景之迹永繫幽冥之坂方將車乘回輪束帛戔戔排金  
風於太微跨天路以妙觀恢皇綱之大烈垂榮祚乎祖  
宗此乃大人之所宜循非凡夫之可企望也無因親展  
書以言心心之所積萬不叙一雲再拜

雲再拜巨卿前行陵有小事唯以具聞事已大了猶以



為願行欲取歸念別方至豫以愍然每相見未嘗不以  
大人為言想令仁士光令遠公然兄弟屢數常存思想  
想令遠分好已為綢固彥恩復蒙誘掖耳無因覲對言  
不盡心屢垂誨以慰遠思雲再拜

雲再拜巨卿在臺高譽洋溢洛邑之內無不欽敬東南  
之貴寶真不但會稽之篠簜也每會常共歌詠信無一  
面不歎吟也想方周旋攜手散今日之思耳雲再拜  
雲再拜輒宣來意仲應此家大自欽重大人儻已見其

意耳

雲再拜不知從事今在州得假歸耳想今來得行有緣  
侍面耳每得令遠書感賴豐化言言歸款來誨恤及亦  
為無已情深欣如云在身年歲及人名聞難集非賴師  
友何以自濟願敢惠助為之光輔巨仁在此華亭之望  
以大人為宗主宜令小大得分亦崇洪業也雲再拜

附車茂安書

永白間因王弘季有書恠足下無答外甥石季甫忽

見使為鄧令除書近下因令便道之職得此固然老人及姊自聞此問三四日中了不能復食妹晝夜號泣不可忍視外甥之中老人真自愛恤季甫恒在目下卒有此役舉家慘感不可深言昨全伯始有一將來是句章人具說此縣既有短狐之疾又有沙蟲害人聞此消息倍益憂慮如其不行恐有節目良為愁憤足下可具示土地之宜企望來報車永白

答車茂安書

雲白前書未報重得來況知賢甥石季甫當屈鄧令尊  
堂憂灼賢妹涕泣上下愁勞舉家慘感何可爾耶輒為  
足下具說鄧縣土地之快非徒浮言華艷而已皆有實  
徵也縣去郡治不出三日直東而出水陸並通西有大  
湖廣縱千頃北有名山南有林澤東臨巨海往往無涯  
汎船長驅一舉千里北接青徐東洞交廣海物惟錯不  
可稱名遏長川以為陂燔茂草以為田火耕水種不煩  
人力決泄任意高下在心舉鉞成雲下鉞成雨既浸既

潤隨時代序也官無逋滯之穀民無饑乏之慮衣食常  
充倉庫恒實榮辱既明禮節甚備為君甚簡為民亦易  
季冬之月牧事既畢嚴霜隕而蒹葭萎林鳥祭而罽羅  
設因民所欲順時遊獵結罝繞堙密罔彌山放鷹走犬  
弓弩亂發鳥不得飛獸不得逸真光赫之觀盤戲之至  
樂也若乃斷遏海浦隔截曲隈隨潮進退采蚌捕魚鱣  
鮪赤尾鰐齒比目不可紀名鱸鰠鰻炙蟹鯢烝石首臠  
鯊蟹真東海之俊味肴膳之至妙也及其蟀蛤之屬目所

希見耳所不聞品類數百難可盡言也昔秦始皇至尊  
至貴前臨終南退燕阿房離宮別館隨意所居沉綸涇  
渭飲馬昆明四方奇麗天下珍玩無所不有猶以不如  
吳會也鄉東觀滄海遂御六軍南巡狩登稽嶽刻文石  
身在鄮縣三十餘日夫以帝王之尊不憚爾行季甫年  
少受命牧民武城之歌足以興化桑弧蓬矢丈夫之志  
經營四方古人所歎何足憂乎且彼吏民恭謹篤慎敬  
愛官長鞭朴不施聲教風靡漢吳以來臨此縣者無不

遷變尊大人賢妹上下當為喜慶歌舞相送勿為慮也  
足下急啟喻寬慰具說此意吾不虛言也傳及不一一  
陸雲白

附車茂安又答書

永白即日得報披省未竟懽懽踊躍輒於母前伏讀  
三周舉家大小豁然忘愁也足下此書足為典誥雖  
山海經異物志二京南都殆不復過也恐有其言能  
無其事耳雖爾猶足息號泣懽懽笑也府君入後月

當西出足下可豫至界上吾欲先一日與卿相見也  
答不復多車永白

弔陳永長書 五首

雲頓首頓首哀懷切怛賢弟永曜早喪俊德酷痛甚痛  
奈何陸士龍頓首頓首

雲頓首頓首天災橫流禍害無常何圖永曜奄忽遇此  
凶問卒至痛心摧剥奈何奈何想念篤性哀悼切裂當  
何堪言無因展告望企鯁咽財遣表唁悲猥不次雲頓



首

永曜茂德遠量一時秀生竒蹤瑋寶灼爾凌羣光國隆  
家人士之望冀其永年遂播盛業攜手退遊假樂此世  
奈何一朝獨先彫落奄聞凶諱禍出不意拊心痛楚肝  
懷如割奈何奈何豈況至性何可為心臨書鯁塞投筆  
傷情

與永曜相得便結願好契闊分愛恩同至親憑烈三益  
終始所願中間離別但爾累年結想之懷夢寐徧徧何

圖忽爾便成永隔哀心慟楚不能自勝痛當奈何奈何  
義在奔馳牽役萬里至心不叙東望貴舍雨淚沾襟今  
遣吏并進薄祭不得臨哀追增切裂幸損至念書重不  
知所言

永曜素自強健了不知有此患險戲之災遂不可救豈  
惟貴門獨喪重寶此賢之殞邦家以瘁情分異他痛心  
殊深已矣遠矣可復奈何追想遺規不去心目悠悠無  
期哀至悲裂不知何言可以言知酷楚而已

弔陳伯華書二首

大君遠資高數世之瑰瑋當光裕大業茂垂勲名奈何  
日朝早爾喪墜自聞凶諱痛心割裂追惟哀摧肝心破  
剥痛當奈何奈何相念夙年奄嬰哀艱扳慕不及當可  
為心牽役遠路無因奔馳東望靈宇五情哽咽割切哀  
慕書重感猥不次

昔與大君分義款篤彌隆之愛恩加兄弟憑此烈好要  
以始卒何圖大君獨先早世遠聞訃問若喪四體拊心

慟楚肝心如割奈何奈何豈況至性當何可言今遣吏  
恭集薄祭不得臨喪以叙悲苦計往人到貴舍之日揮  
涕而已投筆歔歔

移太常府薦張瞻書

蓋聞在昔聖王承天御世殷薦明德思和人神莫不崇  
典謨以教思興禮學以陶遠是以帝堯昭煥而道協人  
天西伯質文而周隆二代大晉建皇崇配天地區夏既  
混禮樂將庸君侯應歷運之會贊天人之期博延俊茂

熙隆載典伏見衛將軍舍人同郡張瞻茂德清粹器慮  
深通初慕聖門棲心重仞啟塗及階遂升樞奧抽靈匱  
於祕宮披金滕於玄夏思樂百氏博採其珍辭邁翰林  
言敷其藻探微集逸思心洞神論道屬書篇章光覲含  
奇宰府婆娑公門棲靜隱寶淪虛藏器裝裳襲錦褐衣  
被玉曾泉改路懸車將邁考槃下位歲聿屢遷搢紳之  
士具懷佩恨方今太清闢宇四門啓籥玄網括地天網  
廣羅慶雲興以招龍和風起而儀鳳誠巖穴耀頡之秋

河津託乘之日也而瞻沉淪下位羣望悼心若得端委  
太學錯綜先典垂纓玉階論道紫宮誠帝室之瑰寶清  
廟之偉器廣樂九奏必登昊天之庭韶夏六變必饗上  
帝之祀矣

陸士龍集卷九

欽定四庫全書

陸士龍集卷十

晉 陸雲 撰

啓疏

諫吳王起西園第宜遵節儉啓

郎中令臣雲言伏見西園大營第室雖未審節度豐儉之制然用工甚嚴竊懼事不得濟愚臣管見輒敢瞽言臣竊見世祖武皇帝臨朝淵默訓世以儉即位二十有



六載宮室臺榭無所新營屢發明詔厚戒豐奢國家纂承務在遵奉而世俗陵遲家競盈溢漸漬波蕩遂已成風雖嚴詔屢宣而侈俗滋廣每觀詔書衆庶歎息清河王昔起墓宅未及極偉時手詔追述先帝節儉之教懇切之旨形于四海清河王毀壞成宅以奉詔命海內聽望咸用欣然臣愚以先帝遺教日以凌替聖上憂勤猶未之振今與國家協崇大化追闡前蹤者實在陛下先敦素朴而後可以訓正四方示民知禁竊謂第室之設

可使儉而不陋凡在崇麗一宜節之以制然後上厭帝  
心下允民望且自開制國之用事從節省而方於此時  
大造第宅又非聖意從簡之旨臣以凡才殿下不以其  
駑闇特蒙拔擢將以臣能有狂夫之言可以裨補聖德  
臣自奉職已來亦思竭忠効節以報所受之施是以不  
慮犯忤敢陳所懷如愚臣言有可采乞垂三省

令吾以頑弱過蒙殊寵夙夜祇懼忝思先恩承風誠  
以自錯厲得爾委曲省以憮然意既在儉約又欲奉

遵法憲豈忘於心國自宜有宅城內求不可得官徒  
右軍來蹂覆此屋恐或不可久得側近宮掖故於國  
作宅不作觀望使如凡家法足止而已耳平量畫圖  
當往相示動靜以聞

臣雲言間一日敢獻瞽言以干聞聽天恩未加咎責猥  
發明令臣伏誦聖旨奉用歎息臣聞有國者不患宮室  
之不崇患在令名之不立是以賢人之在富貴莫不卑  
身節欲損己挹情能保其國家令聞百世歷觀古今以

約失之者實寡以奢失之者蓋衆非天下之至德孰能  
居豐行儉在富能貧清儉節素自殿下家道此所以懷  
集四方而使兆民服者也世祖武皇帝富有四海貴為  
天子居無離宮之館身御家人之服先帝豈欲以此道  
止於治身而已者哉固將必欲遺訓百世貽燕子孫此  
固殿下所宜祇奉也昔淮南太妃當安厝臣兄比下墨  
機時為郎中令從行太妃今追稱先帝養生送終事從  
節儉今宜奉用遺制不事豐厚令旨懇切言歸于約清

河昔起墓宅發手詔又還毀朝野之論於今未已竊以西園第宅用工方嚴雖知聖德節儉有素猶復思關愚言以補萬一亦臣繾綣微忠昊天罔極之誠也至被明令聖旨炳然嘉承至道奉以稱慶不勝下情謹疏以聞

諫吳王起觀疏

郎中令臣雲言前啓西園第宅宜遵先帝節儉之制不宜使至豐麗被命優隆言歸謙素臣奉以欣意而聞屋宇之制既自崇侈竊聞當復起觀六間既非前令之旨

且臣亦竊用不安臣聞詩云昊天有成命二后受之成  
王不敢康今四祖創基既垂成命哲王繼體世祖恭儉  
殿下承之固宜奉不寧而自昔造第過度民歎其勞瘁  
士譏其過尤謗言未弭而又加以崇侈此誠不可不惜  
先帝背世曾未十年而儉德之亡國為其首此又所以  
慷慨酸心而不敢不盡狂夫之諫者也按晉魏以來諸  
侯奢靡第室滋廣未有如國今日之甚者也古人之戒  
猶云無為福始況今猶崇豐侈作為禍先此又臣所以

寤寐憂歎忘寢與食者也殿下誕應運期首建大國固將憲章令典貽範萬世始基之制不可不慎今設為豐奢以示將來子孫象之又何以能國且先帝勤家如彼其素殿下承之若此其泰進傷奉國之典退虧隆家之業用之當身損盛德之譽垂之後嗣非興邦之制一舉而失四得此古人之所以長太息者也且第宅之過朝野所譏而監司結舌莫敢明言者實以殿下國之昵親朝所欽重故隱司過之鋒結執憲之繩耳後世直臣必將

信威明法考制度禮愚以此觀有必毀之理苟此物不可終然誠不如不為使其無毀也今空設過制之物而終為直士之資臣又未見其可也唯殿下思愚臣之言時命有司必省此舉舉手懼還伏用流汗

令中間表作舍先畫圖呈啓間數又五木林栳無他鏤飾示無乃越法奢靡古今無匹也間外啓作小樓北望河東公主園宅自不為觀故便聽之耳今行者嘆息致朝野之譏耶省奏具意勅毀之



請吳王引師友文學觀書問道啓

郎中令臣雲言聞古之君子既盛德在身又外求諸物  
是以廣納俊士博觀載籍朝夕師傅夙夜勤禮賓友嘉  
客講義於前往古來今日聞於耳故知積德廣而流芳  
罔極伏惟殿下天資聰睿應期挺秀聖敬敷聞輝光日  
新即位已來仍遭不造大禮雖闋哀故滋有賓客無接  
觀之宴師友闕講誦之禮愚臣所以寤寐永歎而私懷  
慷慨者也愚以宜發通客之令使朝士有接見之緣又

可時與師友文學披觀文籍坐而論道非學無以聞義  
非士無以行禮禮義既舉羣望允塞此臣下所以拭目  
思德音之發者也臣區區所懷敢以聞

今多喪故乃初未與羣官會同比當請師友文學內  
外官屬也

臣雲言臣前啓可與師友文學觀書論道今又天時清  
適正是講誦之日臣聞崇山之高不厭其峻滄海之量  
無限於廣是以周公一日萬事猶復旁觀百篇孔子假

期玩年至於韋編三絕由是言之雖聖之弘亦不能不求之於學也伏惟殿下明德光飭天資秀朗方當光演文武允迪皇猷如復垂精古今之典仰覽千載之籍則神道叡知無物不照且師友文學朝選於衆以德來教雖豐祿崇禮已隆其人而先王之道未簡聖聽在位累載官廢其職每聽其言亦懷慷慨臣以可於良日就講經學先闡大道永播芳風愚臣區區敢獻瞽言

令多病疾難以辭公事為自力風疾連動故未能用

小差當如所陳乞每識忠至之誠輒以存心

請吳王入朝啓

郎中令臣雲言殿下自即第日來既仍多哀故聖體亦恒不安和自不朝見二宮已經年載前既比造趙軹近又自表出城至五日問訊輒以疾聞臣竊所未安愚以此五日輿駕宜入朝臣聞事君之道苟在盡規知無不為是以愚臣敢獻瞽言

令多不快不數朝覲幸恩詔見恕耳五日當入朝也

請吳王覆校諸官啓

郎中令臣雲言伏見令書以部曲將李咸馮南司馬吳定給使徐泰等覆校諸官市買錢帛簿率日決咸南等治書以下無所復司而察錢帛重寶奸吏多情出入之用誠宜使虛實當法以防檢巧偽然臣愚以聖德龍興光有大國選衆官材庶工肄業臣以虛薄忝竊朝右雖質弱任重無益補察至於奉已思勤昊天罔極中尉該大農誕皆清廉淑慎恪居官次至衆官悉州閭一介䟽

聞之咎雖可日聞至於處義用情庶無大戾今咸南軍  
旅小人定泰士卒廝賤非有清慎素著忠公足稱今猥  
使此等任以覆校大臣所關猶謂未詳咸等督察然後  
得信既非開國勿用之義又傷殿下推誠納下曠蕩之  
量雖使咸等能盡節益國使功利百倍至於光輔國美  
猶未若開懷信士之無失況咸等所益不過姑息之利  
而使小人用事大道凌替此臣所以慷慨也亂之所興  
在於小人得親治之所廢在於君子自替廢興治亂由

此而已臣備位大臣職在獻可苟有管見敢不盡規愚以宜發明令必罷此等覆察衆事一付治書則無外之度闕光照遠大信臨下人思盡節矣謹隨啓以聞

請防不法啓

郎中令臣雲言國人兵放橫多行非法至使暴及市道聲聞京邑親信兵乃罵詈洛陽市丞遠近囂然聲論曰廣而主者前後所報每蒙寬宥故羣小敢肆其暴虐前興駕當東時臣具以奏聞上立節度亦備嚴上下司察

念在奉宣而親信卒秦矯稱突闕強市民物至使行道  
哀窮路人歎惋臣下祇命幸使罪人時獲僉以泰宜加  
重戮以戒肅方來軍都督李嬰行實奸穢然身備王人  
雖不致法猶加捶楚主者秦泰依嬰決罰事寢不出而  
特令原泰秦之凶狡罰至大辟至於今日不蒙薄罰臣  
竊以自今羣醜虎視競為暴虐矣小人得志則下凌上  
替前卿顯言事大農文旨倨傲反成却安功名之士議  
在不辱而顯等恃恩敢行侮慢臣時列啓并呈顯言事



寢不省是以自來拱嘿未敢多言竊見國法日侈而恩宥無已誠懼威禁遂頽醜聲滋聞愚謂自今宜齊之以法使下知禁有司所執猶宜時聽不然以往則監司之吏鋒鉅靡加而準繩替矣臣忝竊非據與聞國事服事以來荏苒三年朝憲多違威御無列好問不登而流聲播越皆由執政之臣官非其人常思收迹自替以避賢路退惟受遇微報未効是用忍垢素餐敢用文諫唯殿下哀明愚臣繾綣愚臣不以前後干迂多見罪責臨紙

慷慨言不自盡

陸士龍集卷十

附錄本傳

陸雲傳

唐太宗御撰

陸雲字士龍六歲能屬文性清正有才理少與兄機齊名雖文章不及機而持論過之號曰二陸幼時吳尚書廣陵閔鴻見而奇之曰此兒若非龍駒當是鳳雛後舉雲賢良時年十六吳平入洛機初詣張華華問雲何在機曰雲有笑疾未敢自見俄而雲至華為人多姿制又好帛繩纏鬚雲見而大笑不能自己先是嘗著縷絰上

船於水中顧見其影因大笑落水人救獲免雲與荀隱素未相識嘗會華坐華曰今日相遇可勿為常談雲因抗手曰雲間陸士龍隱曰日下荀鳴鶴鳴鶴隱字也雲又曰既開青雲覩白雉何不張爾弓挾爾矢隱曰本謂是雲龍騷騷乃是山鹿野麋獸微弩強是以發遲華撫手大笑刺史周浚召為從事謂人曰陸士龍當今之顏子也俄以公府掾為太子舍人出補浚儀令縣居都會之要名為難理雲到官肅然下不能欺市無二價人有

見殺者主名不立雲錄其妻而無所問十許日遣出密  
令人隨後謂曰其去不出十里當有男子候之與語便  
縛來既而果然問之具服云與此妻通共殺其夫聞妻  
得出欲與語憚近縣故遠相要候於是一縣稱其神明  
郡守害其能屢譴責之雲乃去官百姓追思之圖畫形  
象配食縣社尋拜吳王晏郎中令晏於西園大營第室  
雲上書曰云時晏信任部將使覆察諸官錢帛雲又  
陳曰云雲愛才好士多所貢達移書太常府薦同郡

張瞻曰

云

入為尚書郎侍御史太子中舍人中書侍

郎成都王頴表為清河內史頴將討齊王冏以雲為前  
鋒都督會冏誅轉大將軍右司馬頴晚節政衰雲屢以  
正言忤旨孟玖欲用其父為邯鄲令左長史盧志等並阿  
意從之而雲固執不許曰此縣皆公府掾資豈有黃門  
父居之邪玖深忿怨張昌為亂頴上雲為使持節大都  
督前鋒將軍以討昌會伐長沙王乃止機之敗也并收  
雲頴官屬江統蔡克東嵩等上疏曰統等聞人主聖明

臣下盡規苟有所懷不敢不獻昨聞教以陸機後失軍期師徒敗績以法加刑莫不謂當誠足以肅齊三軍威示遠近所謂一人受戮天下知誠者也且聞重教以機圖為反逆應加族誅未知本末者莫不疑惑夫爵人於朝與衆共之刑人於市與衆棄之惟刑之恤古人所慎今明公興舉義兵以除國難四海同心雲合響應罪人之命懸於漏刻泰平之期不旦則夕矣機兄弟並蒙拔擢俱受重任不當背罔極之恩而向垂亡之寇去泰山



之安而赴累卵之危也直以機計慮淺近不能董攝羣  
帥致果殺敵進退之間事有疑似故令聖鑒未察其實  
耳刑誅事大言機有反逆之徵宜令王粹牽秀檢校其  
事今事驗顯然暴之萬姓然後加雲等之誅未足為晚  
今此舉措實為太重得則足令天下情服失則必使四  
方心離不可不令審諦不可不令詳慎統等區區非為  
陸雲請一身之命實慮此舉有得失之機敢竭愚慙以  
備誹謗穎不納統等重請穎遲迴者三日盧志又曰昔

趙王殺中護軍趙浚赦其子驤驤詣明公而擊趙即前  
事也蔡克入至穎前叩頭流血曰雲為孟玖所怨遠近  
莫不聞今果見殺罪無彰驗將令羣心疑惑竊為明公  
惜之僚屬隨克入者數十人流涕固請穎惻然有宥雲  
色孟玖扶穎入催令殺雲時年四十二有二女無男門  
生故吏迎喪葬清河修墓立碑四時祠祭所著文章三  
百四十九篇又撰新書十篇並行於世初雲嘗行逗宿  
故人家夜暗迷路莫知所從忽望草中有火光於是趣

之至一家便寄宿見一年少美風姿共談老子辭致深  
遠向曉辭去行十許里至故人家云此數十里中無人  
居雲意始悟却尋昨宿處乃王弼冢雲本無玄學自此  
談老殊進雲弟晚為平東祭酒亦有清譽與雲同遇害  
大將軍參軍孫惠與淮南內史朱誕書曰不意三陸相  
攜聞朝一旦湮滅道業淪喪痛酷之深荼毒難言國喪  
傷望悲豈一人其為州里所痛悼如此後東海王越討  
頴移檄天下亦以機雲兄弟枉害罪狀頴云